



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

**Ioannis Evsebii Nierembergii Madritensis Ex Societate  
lesv De Adoratione In Spiritv Et Veritate Libri Qvatvor**

**Nieremberg, Juan Eusebio**

**Antverpiæ, 1631**

Cap XIV. De solertiâ circa res exiguas.

[urn:nbn:de:hbz:466:1-46187](https://nbn-resolving.org/urn:nbn:de:hbz:466:1-46187)

## CAPVT XIV.

*De solertiâ circa res exiguas.*

**D**Eus maximus est : in eius obsequio nihil putes minimum : non satis magnus esset , nisi vinceret omnem paruitatem. Si amas illum , in minimis officiis probatur vera amicitia. Peritia artis in paruis ostenditur : virtutis perfectio non est rudior , ideoque non expectat solum magna. Natura in minimis admirabilior est : minutissima animalia maxime curat. Gratia non est obtusior , nec debet esse segnior. Quæ minutiora videntur , diligentius curanda sunt. Cùm Deus tantus sit , nihil est paruum , quod ei displicet , aut quod ei placet. In bono & malo non est minutum. Quidquid bonum est , statim est magnum : quidquid malum est , statim non est paruum. Infinita bonitas omnes nostras vires exigit : iniuriam faciet , qui debet omnia , si neget aliquid. Ne dicas , Hoc quid præstat , hoc parum interest , hoc nihil est. Imò multum est hoc quod putas nihil ; quia quod putas multum aut aliquod magnum opus , nihil est præ magnitudine Dei , & obligatione tuâ. O immensa Veritas , quomodo potest putari minimum , aut magnum , si mensura obligationis & diligentiae meæ est

O 3                    immen-



immensitas tua , vbi non est paruum , nec magnum dumtaxat , sed excessus totius modi ? quomodo possum dicere , Hoc parum est ; si quidquid fecero pro te , nihil est ?

Non est paruum quod censetur minimum , cùm in minimis stet perfectio. Non sunt contemnenda minima , quia contempta sunt magna. In strue aridorum palmitum , quam domi habes , si scintillam ignis permittas , incendium magnum fiet , & tota domus conflagrabit. Corruptio naturæ nostræ aptior est malitiæ , quàm stupa sicca igni. Si leue aliquid negligas , fies paulatim peruersus. Non attendas paruitatem quæ est in initio , sed ex principio considera finem. Semina semper exigua nimis sunt ; sed in nullâ parte plantarum maior efficacia & vis est. Primum diuortium duarum viarum sensim protractum in maximum interuallum definit ; & in infinitum procedere potest , cùm prius nec vno gradu distarent. Si in paruo deuias à proposito tuo & rigore mentis , paulatim te inuenies longinquum à feruore. Magna sumunt initium à paruis : quare parum non est minimum , si est initium. Cuiusque rei præcipua pars principium est : imò non pars quælibet , sed dimidium totius dicitur.

Rectè putabat sanctus Ignatius Pater noster , plus latere periculi in minutis contem-  
nendis,



DE ADOR. IN SPIRITU ET VER. LIB. II. 215  
nendis, quàm in maximis: horum damnum  
apparet, & curari statim potest; at minima-  
rum rerum iniuria nisi progrediente tempo-  
re non percipitur, cum vix restaurari potest  
roborata consuetudine. Peccata magna, ipsa  
natura peccati & enormitas facit, vt auerse-  
mur: minimi defectus, quia parui videntur,  
hoc ipso negliguntur; iisq̄ue contemptis, non  
excitatur mens aduersus illa. Concupiscen-  
tia nostra in minimis acuitur, & ardet, quòd  
sine magno periculo putet posse in his va-  
gari, cum in magnis se compescat terrore  
damni patentis: at irritata & erudita semel  
cupiditas, in quæ non audebit & ardebit? In-  
de aliquando multò sollicitiores aduersus  
parua debemus agere, quàm contra magna.  
Ex minimis consuetudo nascitur, quæ præ-  
scribit vitia; non ex magnis, quia sunt raro-  
ra: nec minùs violentum erit resistere con-  
suetudini, quàm naturæ. Facile ius & actio ci-  
tiùs datur aduersus capientem per vim no-  
stra, & palàm, quàm in vsucipientem. Quæ  
leuia videntur, auferunt à nobis pudorem  
peccandi: sed amissâ semel verecundiâ erga  
Deum, quid boni ex nobis promittimus?

Erubescere te continere à magnis, & vinci à  
paruis: nam ab hoste exili & pumilione  
sterni, turpissimum & ignaui signum est.  
Non contempndum est paruum, in quo



magnum pretium potest esse. Margarita quòd sit exigua, non putatur vilis; imò proinde pretiosior est, quòd in paruo corpore magnum pretium habeat: cur paruum contemnis, vbi plus fortasse placere Deo potes, quàm in maioribus? Pretiosius est obsequium & diligentia in minimis. Quemadmodum enim peritia artis est, includere in paruo magnum artificium; & naturam miramur, quòd in exiguis animantibus omnes officinas vitæ claudat: sic excellentia amoris est, ponere animum totum etiam in minimis, & magnum & ardentem affectum concludere in paruis rebus: & pretiosior est diligentia minorum, nam magnitudinis defectus ex affectu instauratur, qui est rerum pretium. Nihil rectè æstimatur, nisi ex animo: magnum est minimum obsequium, vbi est animus magnus. At non rarò maior est animus in paruis: quare non minùs gratum sæpè erit officium & solertia illorum. Magna per se excitant attentionem, & non molestant, quia rariùs contingunt: minima verò minùs admonent animum, nec expergefaciunt; & quia crebriora, fatigant: quare animus curator minimorum, magis est in illis, quia magis vigil, magis constans, & pertinax ad obtemperandum esse videtur. Non igitur magnus desiderator Christi erit, qui solùm ma-  
gna



gna curat: non erit ardens amator Dei, qui mundum & se reliquit in magnis, nisi etiam in minimis. Sculptoris ars perfecta non est, cortice spoliare truncum, & deuastare per magna frustra; quilibet hoc faciet: sed postea festucas minutissimas scitè recidere, subtilissimas cavitates euacuare, & minimis manum imponere, solus magister artis potest. In tabulâ umbras & primos colores tyro artis ducere potest; sed ad perfectionem picturæ, subtilitate periti manus & penicilli est opus, & in minimis lineis magnum opus consummatur: ita in minutissimis officiis virtutum absoluitur similitudo Dei. Non est imago perfecta, quæ caput, ventrem & pedes habet; sed in quâ omnia affabrè sunt laborata: cur rudem & informem imaginem vis te Deo præsentare ob defectum minimæ rei?

O infinite & perfectissime Domine, quid minimum possum putare, quod à te me amouere quàm minimum potest, aut magis assimilare? quid minimum reputabo, quod tu desideras me vitare, aut facere? cur minimum præterire possum pro maiestate tuâ & gloriâ, quin faciam, omnia; cum nihil pro vilitate & peccato meo prætermiseris, quod non faceres? O spiritus remisse, si Angelus è cælo tibi nuntiaret quòd Deus vellet te pati tormenta sancti Laurentij pro gloriâ suâ, &



218 IO. EVSEBII NIEREMBERGII  
gratiarum actione ob beneficia à Christo  
collata in genus humanum, quàm ingratus  
esses, si fortè non haberes id pro magno fa-  
uore, & minimum id putares? Ecce, quid di-  
ces? non ignes, non equuleos, non carceres,  
non cruciatus Deus à te modò exigit; sed vt  
attendas in hac re minimâ, & non negligas:  
magnum hoc puta: hæc est voluntas Dei, vt  
hæc cures; & sufficit. Martyres per magna-  
rum pœnarum patientiam sancti habiti sunt:  
Confessores, per minimarum culparum im-  
patientiam & fugam, sanctitatem conse-  
quuntur. Illi pœnas omnes tolerantes, vita-  
runt culpas: isti nullas culpas tolerantes, vi-  
tant maiores pœnas purgatorij.

#### CAPVT XV.

*Laudem propriam vitandam esse.*

**Q**ui amat laudari, vult quid impossibile.  
Laus bonum aliquem publicat: sed hoc  
ipso quòd laudari velis, non modò vacuus es  
omni bono, sed plenus maximo malo, nem-  
pe diabolico, superbiâ, & ambitione. Licet  
audias laudari; non tu laudaberis, sed alius.  
Laus boni est: sed tu pessimus eris, qui laudis  
es cupidus. Nequit bonus esse, aut laude di-  
gnus, qui tam vanus est, vt laudari quærat.  
Quare desinit esse laudabilis, qui vult lauda-  
ri;